



Synfocity = 534

mail us at : mzsynfo@gmail.com; mizoramsynod@gmail.com - Phone - 2314648

1st May, 2015

□ **PBS Farewell & Dedication Service Wawi 33-na**

April 23, 2015 khan Presbyterian Bible School chuan Session 33-na zir chhuakte pualin Farewell-cum-Dedication Service an hmang. He programme hi Zosaphluia Building, Synod Office Complex-ah neih a ni a, Rev. P.C. Pachhunga, Executive Secretary i/c PBS-in a kaihrui.

Board Member Rev. Vanlalzuata'n inhmelhriattirna hun a hmang a, Rev. Lalneihvura, Principal-in reports pein Rev. J. Vanlalhnuna, Board member-in certificate a sem a, Rev. Vansawma, Board member-in zirlaite chu Pathian hnenah hlanin thuchah a sawi a, Upa Vanengmawia, Synod Statistician-in Lawmman a sem.

Rev. Dr. K. Lallawmzuala, Board member-in zir chhuakte tawngtaisakna hun a hmang a, Board member aiawh leh zirlai aiawhte atangin thutawi ngaihthlak a ni. Rev. R. Lalsawtan lawmthu a sawi a, chairman-in Malsawmna sawiin inkhawm a tin.

PBS-ah hian a din tih atangin tun thleng hian zirlai 1463 an awm tawh a, chung zinga 121 chu an passed a ni. Tuna session 33-naah hian zirlai 51 an awm a, 41 passed-in 2 an failed a, 8-in exam an pal tlang lo. Exam-a titha zual pathumna thlengin lawmman Rs.1000/-, Rs.700/-, Rs.500/- hlan an ni a, chungte chu :-

1st Lalawmpuia Chenkual S/o C. Lalhmachhuana, Chaltlang

1st Lalruatfeli D/o Dingliana, Hlimen

2nd R. Zothanmawia S/o Lalsanglura, Bungkawn

3rd Samuel S/o P. Malsawma, Zodin, Tlabung

Session 33-na zirlai zingah hian kai kim 5 lai an awm a, an hnenah lawmman Rs.500/- theuh hlan a ni. Session tinin zirlai zingah Kristian Theology leh Kohhran Inrelbawlina & PCI Danpui subject-ahte hian a titha ber hnenah Pu C. Awithanga Award hlan thin a ni a, award hian pawisa fai Rs.1000/- a keng tel a ni. Award dawngtute chu:-

1. Kristian Theology - R. Zothanmawia S/o Lalsanglura, Bungkawn

2. Kohhran Inrelbawlina & PCI Danpui - Lalchhanhima S/o Lalhmachhuana (L), Chaltlang

PBS hian kum 2015 atang hian Principal thar a nei a, Principal thar Rev. Lalneihvura hian January thla khan Rev. R. Lalengmawia kut atangin mawhphurhna a la chhawng a ni. Tunah hian Teaching staff 5 leh Non teaching staff 2 an awm.

□ **Ramthar Board wawi 152-na a thu**

April 28, 2015 khan Synod Office-a JM Lloyd Hall-ah Ramthar Board wawi 152-na a thu. Board meeting hi Rev. Lalrinmawia, Synod Moderator-in a kaihrui a, Secretary reports ngaihthlak a ni.

Tun tum Board hian thu pawimawh tak tak 16 lai a ngaihtuah a, Kathmandu, nepal-a ram lei chungchang Synod 2014-in a lo rel tawh bawhzui dan tur te, Arunachal & Assam Mission Field West then rawtna BEC-in a lo thlir tawh kalpui zui zel dan tur te, Jharkhand Field Headquarters Office building Plan thlir hona te neih a ni. Office building hi nuai 93 vel senga sak tura ruahman a ni.

Field lama Kohhran panga laiin an hming thlak rawtna an thlen te ngaihtuah a ni a, Missionary Retreat neih dan ennawn te, Delhi Mission Field-a Office leh Synod House-a thawk tur IV Grade dilna te, Interserve-a thawktu tam zawk tir tura ngenna an dawn te leh Tripura Synod Headquarters hmun tur lei chungchang te ngaihtuah a ni bawh. Hengte bakah hian thil pawimawh tam tak sawi ho a ni a, tun hnaia Nepal rama lirnghing tuar zawng zawngte Ramthar Board Committee chuan a tawrhpu takzet a, kan Mizo missionary-te nunna chan an awm lo hlauh chu lawmawm an tih rualin an chhiattawhna an tawrhpui thu an tarlang bawh.

Kumin (2015) March thla chhung khan Mission Field lamah School building thar pathum hawn a ni a, heng school pathumte sak nan hian a vaiin cheng nuai 113 sen a ni. February - April, 2015 thleng khan Kohhran pariatah Ramthar campaign neia feh chhuah a ni a. 2014 - 2015 Ramthar Budget Rs.65,45,77,000/- (Nuai sangruk zanga sawmli panga singsarih sangsarih)-ah Rs.66,55,25,164/- (Nuai sangruk zaruk sawmnga panga singhni sangnga za sawmrak leh pali) hmuh a ni a, kum hmasaa hmuh khumna hi za zela 11.98 lai a ni.

□ **Zin**

♦ May 1 - 4, 2015 hian Presbytery thar hawna, Kolasib-a neih turah Rev. Lalzuithanga, Senior Executive Secretary a kal ang.

♦ May 2, 2015 (Inrinni) hian Aizawl Hmarchhak Presbytery thar hawna, Bawngkawn Chhim Veng Kohhranah Rev. Lalramliana Pachuau, Executive Secretary a tel ang. Rev. Lalramliana Pachuau hian May 3, 2015 (Pathianni) -ah Sialsuk Kohhran Centenary lawmna a hmanpui ang a, an thupui 'Hei leh chen hi Lalpa'n min pui a ni' (I Sam 7:12) tih hmangin Pathian thuchah a sawi ang.

♦ May 2 - 4, 2015 hian Nisapui Kohhran tlawh turin Dr. Robert S Halliday, Superintendent, Synod Office leh Upa Rochungnunga, Chaltlang South te an kal ang.

□ **Mizo Bible Dictionary tlangzarh dawn**

Synod Literature & Publication Board (SL&PB) -in kum eng emaw zat Project atana a lo neih tawh, Mizo Bible Dictionary chu May 6, 2015 (Nilaini) chawhnu dar 2:00-ah Pi Zaii Hall, Synod Conference Centre-ah tlangzarh a ni ang.

Tlangzarh inkhawm programme hi Rev. Lalzuithanga, Senior Executive Secretary-in a kaihrui ang a, Rev. K. Lalpiangthara, Secretary & Editor, SL&PB-in Report a pe ang. Synod Moderator Rev. Lalrinmawian Mizo Bible Dictionary hi tlangzarhin thu sawi ang a, Rev. K. Lungmuana, SL&PB BEC Member-in Pathian hnenah a hlan ang. A duh apiang tan thusawina hun hawn a ni ang a, Rev. Thangzauva, SL&PB BEC Member & Former Editor, SL&PB-in lawmthu sawina hun a hmang ang a, Rev. B. Sangthanga, Synod Secretary-in Malsawmnain inkhawm a tin ang.

Heta tel tur hian Aizawl khawpui chung Pastor leh Pro. Pastor bakah Kohhran tin aiawh pakhat theuh sawm an ni. Mizo Bible Dictionary hi Rs. 800/- man tur a ni a, tlangzarh ni hian tlangzarhnaa telte hnenah discount (Rs. 300/-) pek an ni ang.

□ **Nepal ram lirnghing**

April 25, 2015 (Inrinni)-a Nepal leh a chhehvela lirnghingah khan Kathmandu chu a tuar nasa ber pawl a ni a, inchhia a tam a, thi pawh an tam hle. Pathian zarah vanneihthlak takin kan miten harsatna lutuk (nunna chan) an tawh lo hlauh. Chutih rualin kan mite chenna in erawh a chhe nual a, in luah tlak loh chhe vek hi in pariat(8) awmin chung zinga in pathum(3) chu mi inluah a ni.

Contd...

Heng bakah hian thingtlang lam, Pastor ten an hmuh phak mai loh, report dawn a awm bawk. Chungte chu:

1. Dharan Bial, Lucham : Chenna in a chhe nasa hle a, luah tlak loh pawh a awm nual. Biak In pawh a bang a chim.
2. Dharan Bial, Naharkote Biak In dinglam sir tukverh chung chin a chim.
3. Manahari Bial, Sunachori: Kan kohhran mi in pakhat a chhia, Panjani Biak In a chhe bawk a, sak that a ngaih hmel. Sunachori Biak In hungna a chim bawk.
4. Bhartpur bial a mi Padampur Biak In sak lai hmalam bang a chim a, rem that leh theih mai a nih hmel. Zarkawt kohhran sak lai a ni. Simalgari-ah kan kohhran mi pakhat in bang sir khat a chim bawk.

Synod Officers' Meeting (OM) chuan chhiatna tawkte pual hian tawngtai rualna neih ni se tiin a rel a, Kohhranhote thahnemngai taka tawngtaisak turin an ngen a ni. Tawngtai rual thupui tur a hnuaiah tarlan a ni.

☐ **PYF 21st Biennial Conference**

May 1 - 3, 2015 chung hian Presbyterian Youth Fellowship (PYF) Biennial Conference vawi 21-na, Khliehriat Presbyterian Church (KJP Synod Mihngi) an neih a ni dawn a, thupuih 'Youth, the aroma of Christ' (II Cor. 2:15) an hmang ang.

He PYF Biennial Conference-ah hian KTP aiawha palai turin Central KTP hruaitute, Mizoram Synod Choir leh Palai ruat sa nen an vaiin mi 100 an kal. Programme kimchang www.mizoramsynod.org ah tarlan a ni.

☐ **Synod-in chhawmdawlina pe**

Tun hnaia thlipui tuarte hnenah Synod Relief Fund atangin chhawmdawlina hetiang hian pek an ni :

Sn.	Khua	In tihchhiat zat	Chhawmdawlina pek zat
1.	Zemabawk South	13	Rs. 65,000/-
2.	Lawipu Veng	23	Rs. 97,000/-
3.	Zawlpui	2	Rs. 20,000/-
4.	Bungkawn	1	Rs. 5,000/-

☐ **Hruaina Eng FM Radio & TV Programme**

♦ **MAY 1, 2015 (FM ZOAWI AIZAWL @ 7:30 P.M.)**

Solo : TBZ Choir - Ka Rawn Inhlane, **Zaipawl** : Hlutei - Josua leh Kaleba, **Thuchah** : Dr. R. Lalrindiki - zlaucoma (mitmu pressure sang), **Solo** : BESY Choir - Ringtu Tawngtaina, **Zaipawl** : Feli Thangluah - I lamah min hip rawh

♦ **MAY 1, 2015 (FM LUNGLEI @ 7:30 P.M.)**

Solo : TBZ Choir - Ka Rawn Inhlane, **Zaipawl** : Hlutei - Josua leh Kaleba, **Thuchah** : Dr. R. Lalrindiki - Glaucoma (mitmu pressure sang), **Solo** : BESY Choir - Ringtu Tawngtaina, **Zaipawl** : Feli Thangluah - I lamah min hip rawh

♦ **MAY 3, 2015 (Tv Programme) @ 3:00 p.m.) :**

Zaipawl : Mizoram Synod Choir - Silfaina, **Bihchianna** : Chaltlang Kohhran hlimna, **Solo** : H.Zarzoliana - Lalnunnema, **Skit** : Dinthar KTP

☐ **Susamachar Prasaran Programme**

♦ **MAY 1, 2015 (Pathianni) 5:00 pm. Hindi Gospel Programme (Susamachar Prasaran) :**

Group/Choir/Solo : Kristian Centre Zaipawl - Hawale, **Group/Choir/Solo** : Soni Lalnunsangi - Ashantima, **Sermon** : Rev. P.C. Rohlira, **Group/Choir/Solo** : Chawlhmun Masihi Sangati - Tu Pyar, **Group/Choir/Solo** : Chhinga Veng Masihi Sangati - Isu Bula Raha Hai

☐ **Moderator Programme**

Synod Moderator Rev.Lalrinmawia chuan tunkar tawpah hetiang hian hun a hmang ang :

- ♦ May 1, 2015 (Zirtawpni) : Tanhril Vengthar Kohhran Silver Jubilee
- ♦ May 2 & 3, 2015 (Inrinnini - Pathianni) : Aizawl North Presbytery hawanna, Chawnpui Kohhran

NEPAL LIRNGHING PUALA TAWNGTAIRUAL

April 25, 2015 (Inrinni)-a lirnghing nasa takin Nepal leh a ram chhehvel a sawi avanga mi tam takin in leh lo leh nunna hial an chan laiin Nepal, Bihar, Uttar Pradesh leh Rajasthan-a kan rawngbawltute chu Pathian khawngaihna azarah an him tih Kohhran mipuite kan inhriattir e.

Synod Officers' Meeting (OM) chuan May 2, 2015 (Inrinni) zan inkhawmah hian Kohhranhote chhiatna tawkte tan a hnuai thupui-te hmang hian tawngtai rualna neih ni se tiin a rel a. Kohhranhote thahnemngai taka tawngtaisak turin kan inngen nghal bawk e.

Tawngtai thupui :-

1. Missionary leh an chungte tan.
2. Chhiat tawkte tan
3. Harsatna tawkte thil tha lo dang thleng thei laka an him theih nan
4. Chhanchhuah hna thawktuten tha taka an thawh theih nan

Sd/-
REV. B. SANGTHANGA
Secretary, Mizoram Synod

MPF IN LAWMTHU A SAWI

April 30, 2015-a Mizorama Village Council (VC) leh Local Council (LC) buaina leh harsatna lutuk awm lova tluang taka inthlan kan neih theih avangin MPF General Headquarters chuan, Zoram mipui zawng zawngte leh Pathian hnenah lawmthu a sawi a. Inthlanna thianglim leh felfai tak kan neih theih nana hma latu MPF Forum hrang hrangte hnenah pawh thilung takin lawmthu a sawi a ni.

General Secretary
MPF Gen. Hqrs., Aizawl